

曾文正公奏稿

曾文正公奏稿

卷之三十六目錄

報交卸日期摺

同治九年九月初六日

謝恩賜壽摺

九月十六日

恭請 陛見摺

全日

報接印日期摺

十一月初一日

會議海運交米摺

同治十年正月十二日

籌辦河運事宜摺

全日

覆陳淮南鹽價難增摺

二月初二日

議復楚省淮南引地摺

三月十九日

聖訓頒到謝恩摺
六月十三日

大閱事竣摺
十一月初一日

續議江蘇水師事宜摺
十二月二十二日

楚岸鹽引淮川分界行銷摺
同治十一年正月二十八日

報交卸日期摺
同治九年九月初六日

奏為微臣交卸日期恭摺奏報仰祈

聖鑒事竊臣前奉

諭旨調任兩江并飭新任督臣李鴻章馳赴天津接篆茲李鴻章於八月二十五日行抵天津九月初六日臣飭派署天津府知府馬繩武大沽協副將張秉鐸賁送直隸總督關防長蘆鹽政印信交李鴻章接受任事其

王命旂牌等件存於保定署內天津滋事之案第二批首從各犯訊辦已有端倪數日內即可奏結此後應辦情形均經詳細熟商新任督臣李鴻章必能斟酌機宜由全大局仰釋

聖慮所荷微臣交卸日期理合繕摺具陳伏乞

皇太后

皇上聖鑒謹

奏

謝 恩賜壽摺 同治九年九月十六日

奏爲恭謝

天恩仰祈

聖鑒事竊 臣於本月十二日承准軍機大臣咨交到

恩賞 臣六十生辰

御書勲高柱石匾額一面

御書福壽字各一方梵銅壽佛一尊紫檀嵌玉如意一柄蟒袍

面一件小卷吉綢十件 臣當卽恭設香案望

闕叩頭祇領伏念 臣忝任封圻渥承

知遇愧涓埃之無補憾歲月之侵頽迺當馬齒漸加復荷

龍光下逮瞻昭回於

宸翰彩煥雲霞增兢惕於臣心

褒慚柱石託

福林而自

天降祐依

壽寓而由

帝錫齡對茲寶相莊嚴彌深恪敬捧到瓊枝溫厯用效指麾黼黻生華備彰施於五采絲絃入詠增晏粲於三英臣惟有勉竭愚忱堅持晚節偕兆民而蹈德共沐

一人有慶之麻瞻

九陛以陳詞更晉

萬壽無疆之頌所有微臣感激榮幸下忱謹繕摺恭謝

天恩伏乞

皇太后

皇上聖鑒謹

奏

恭請 陛見摺 同治九年九月十六日

奏爲遵

旨赴任兩江恭請

陛見仰祈

聖鑒事竊臣前奉

諭旨調補兩江總督當因目病已深不能重履江南奏請另簡賢能畀以兩江重任八月初十日奉

上諭曾國藩奏瀝陳病目情形懇請另簡賢能畀以兩江重任俟津事奏結再請開大學士缺專心調理一摺兩江事務殷繁職任綦重曾國藩老成宿望前在江南多年情形熟悉措置咸

宜現雖目疾未痊但能該督坐鎮其閒諸事自可就理該督所請另簡賢能之處著毋庸議仍著俟津事奏結卽行前赴兩江總督之任毋再固辭欽此

訓辭懇至惶悚曷任臣前承乏江南初無治狀荷蒙

獎勵抱愧已深今則衰疾相尋尤難再膺劇職

聖主體恤備至許以坐鎮不令固辭慚感交并罔知所報欲勉從

後命則病軀難供軀策必致隕越貽譏欲自遂初衷則聖恩已極優容何敢再三瀆請謹當遵

旨赴官力疾視事揆諸古人鞠躬盡瘁之義一息尙存不敢稍

耿安逸特目病萬難痊除兩腳近復浮腫貽誤實在意中早夜
慄慄常懼辜負

聖恩目下津案首從各犯業已奏結二批和議不難卽定臣可
毋庸久畱惟有仰懇

天恩准令入都

陛見面聆

訓示再赴新任本日又奉九月十五日

寄諭曾國藩等本係特簡查辦津案之員此時該繙譯業已抵
津修堂撫恤諸事在津易於定議卽著該督等晤商德微理亞
妥籌辦理迅速具奏等因欽此查德微理亞業於十三日回京

由天津府派外委郭仲奎護送此閒別無法國人員無從與議
賠償撫恤等事應否在京定議如德繙譯再來津郡似可卽由
督臣李鴻章等與之議結恭候

聖訓遵行所有

微臣籲請

陛見緣由謹繕摺附驛具奏伏乞

皇太后

皇上聖鑒訓示謹

奏

報接印日期摺
同治九年十一月初六日

奏爲恭報微臣接印日期仰祈

聖鑒事竊臣入都

陛見跪聆

聖訓後於十月十五日出京二十八日至山東濟甯州由水路南下閏十月二十日行抵江甯省城二十二日准署督臣魁玉飭派署江甯府知府蒯德模署中軍副將周良才齎送兩江總督關防鹽政印信

欽差大臣關防及

王命旗牌文卷等件一併移交前來臣當卽恭設香案望

關叩頭謝

恩任事伏思兩江地大物博政務殷繁臣前此承乏數年於一切察吏安民防江籌海諸大政頗思實心整理均有志而未逮茲以衰病之軀渥被

新綸重臨舊地凡清議所責望眾情所瞻矚臣心所素願自勉者自揣精力更遜於前能否隨事補救尙無把握五中循省悚惕滋深惟有廣集眾思力圖補過勉策桑榆之效冀收尺寸之長以仰答

高厚鴻慈於萬一所有

微臣

接印日期除恭疏具題外理合專

摺陳奏伏乞

皇太后

皇上聖鑒再通商事件未經奉有

明諭目下蘇州巡撫新舊交替尙未履任臣自應將洋務日行文件從權核辦暫用總督關防所有

欽差大臣關防敬謹封儲聽候

諭旨合並聲明謹

奏

會議海運交米摺

同治十年正月十二日

奏爲遵

旨會議海運米石改由糧道赴通徑交擬俟下屆再行試辦恭摺仰祈

聖鑒事竊臣等承准軍機大臣字寄同治九年十一月二十日奉

上諭海運交卸一節該部擬請按照河運章程改由糧道赴通徑交係爲掃除積弊起見著曾國藩李鴻章英桂張兆棟張之萬楊昌濬斟酌情形詳細妥商會同覈議具奏原摺片均著分別鈔給閱看等因欽此臣國藩當卽劄飭江蘇糧道英樸會同

藩司核議詳覆 臣昌濬亦卽劄飭浙江糧道如山會同司道核
議詳覆旋據浙江糧道如山等會詳稱海運章程始自道光六
年由滬運津責成南省委員由津運通責成北省委員釐然判
而爲二各有專責奉行既久法非不善而弊卽叢生今欲大改
章程不外除弊節費二事然運通之弊全在剝船若改由糧道
委員押運以隔省人地生疏之委員稽察隔省積慣作弊之船
戶恐呼應不靈其弊更甚至海運經費係按照米數備帶赴津
力求撙節方可敷用向來北省押米員弁多至一百數十員今
若改由南省帶員赴北薪水旣多川資更鉅卽此一項已形糜
費其餘各款亦必驟增恐於事未必有濟而所費更屬不支又

津局以起剝爲重通壩以交卸爲重糧道專駐津局則交米之事無所專責先赴通壩則起剝之事又恐羈延而沙船在津等候太久耗費更多尤慮畏累遠避有礙於下次之招雇種種窒礙未敢輕議更張等語由臣昌濬咨商臣國藩察核所陳各節均係切中事理並非意存推諉卽擬據詳會奏矣適又接江蘇糧道英樸稟稱邇來海運弊不在商船之運津而在剝船之運通剝船舞弊固由積習之相沿亦由水腳之過少該船戶既虧累於平時復需用於臨事偷漏攙和無弊不作致令乾圓潔淨之米一交剝船米色頓壞殊爲可惜今欲力矯前失惟有遵照部議由南省糧道徑運交通自津過剝以後慎選委員以押運

舟分設卡段以司稽查嚴定偷漏罪名以鈐制之節省經紀等費以優恤之或可一洗剝船之弊至封僱彈壓等事仍由直隸地方官妥爲照料南北通籌恩威並用漕務當有起色現已草創章程十四條雖不能十分周密請卽試辦一年等語臣國藩以該糧道英樸在浙江辦理海運三次調任江蘇又辦九年分一次一切情形久爲熟習旣冒力爲其難勇於任事果能除漕米攙水潮雜之弊豈非大有裨益復經函商臣之萬臣昌濬酌核辦理臣昌濬旋又覆函以爲運通之弊果能改絃更張實爲中外所共願惟改章而仍用額設之經紀向有之剝船則從前錮習牢不可破若欲重立新章另行雇船另行派人則事屬創

始必須通盤籌畫確有把握方可試辦接准閩浙督臣英桂來
函亦深慮驟然改章諸多窒礙現在米船將次放洋爲期已迫
糧道如山議請俟下屆再行試辦與其倉猝改章不如從容集
議臣之萬覆函亦稱直隸督臣李鴻章覆奏海運事宜摺內業
已聲明今年新漕只能照章在津驗收

諭旨允派倉場侍郎一員赴津會辦若改爲徑運赴通驗收則
南北辦理兩歧奏咨商改多費周章殊覺不便臣國藩參考眾
論酌度時勢本年海運應仍在天津驗收江蘇糧道英樸既有
創辦徑運赴通之志浙江糧道如山續行覈議亦有下屆試辦
之請臣等公同定議檄飭英樸如山於馳抵天津後先將本年

糧米查照向章辦理再將下屆糧米運通改章之處面稟李鴻
章應將經紀若何更換剥船若何整頓各項經費若何覈實動
用一一籌度不厭精詳俟下屆漕糧海運由臣等先期議定新
章奏明辦理以昭慎重所有海運米石改由糧道赴通徑交擬
俟下屆試辦緣由謹會同閩浙總督臣英桂漕運總督臣張兆
棟恭摺覆陳伏乞

皇太后

皇上聖鑒訓示謹

奏

籌辦河運事宜摺

同治十年正月十二日

奏爲陳明河運艱難情形應行設法預籌恭摺仰祈

聖鑒事竊九年分江北冬漕遵照部議仍辦河運臣於十一月十二日專摺陳奏在案伏查八年分江北漕米於九年河運赴通節節阻滯水陸兼運直至十月杪始能蒞事一切經費雖由糧道王大經格外撙節不至過鉅而人事之艱時日之久較之海運難易懸殊該糧道交米事竣赴部引

見現已馳回江南臣面詢情形證以臣出京時由運河南下所見者其言多屬相符若不預爲籌畫恐下次又蹈覆轍據稱本屆承辦河運在事六月之久中間處處阻滯歷歷可數如嶧縣

境內之大泛口該處爲山水經由之所一遇暴漲則汎流急湍
迨水退之後則沙淤停積今年漕船經過該處水深不及二尺
河底碎石縱橫最礙舟行必須由山東認真興挑挖深四五尺
並將近灘石堆剷除與河底配平方利行駛自大泛口而北則
有滕縣境內之郝山口該處爲入湖要道淺而且窄又微山湖
內之王家樓滿家口安家口獨山湖內之利建閘南陽湖北之
新店閘華家淺石佛閘南旺閘分水龍王廟以北之劉老口袁
口閘處處淤淺或數十丈或百餘丈亦須由山東逐段勘明一
律挑深方可無阻此未渡黃以前阻滯之處宜預爲籌辦者也
議者謂早日開兌早日過湖即使費力尙不愆期不知濟甯以

南淺處已多濟甯以北運河尤爲乾涸總須守候伏汛盛漲方足以資浮送至黃水竄運之處漸徙而南自安山至戴家廟三十里自戴家廟至八里廟二十二里運河舊有之隄盡被黃水衝破缺口極多黃水湍悍而勢急漕船載重而質脆斷難破浪而行需用划船下椀以立之根然後由漕船繳關步步上移否則簸蕩急湍之中無復收泊之處而十里鋪姜家莊道人橋等處又極淤淺似須由山東設法一面於淤阻處極力疏濬一面於運隄各缺口排釘木椿貫以巨索俾漕船經過有所依傍牽挽不至爲洪溜所吸倉卒失事此渡黃時艱滯情形宜預爲籌辦者也及至渡黃以後若在伏汛未落以前或易爲力若伏汛

已過等候秋汛卽屬杳茫不可必之數九年在八里廟守候兩月之久可爲前鑒自張秋至臨清二百餘里河身有高有下其疏導之法須量河身之高下高者開挖宜深下者開挖稍淺庶可高低相等一律深通再於黃流已長未落之時卽下閘板蓄水以免消耗或就平水南閘迤東築一挑水壩引黃入運皆多方設法力圖斡旋之策此渡黃以後運道易涸宜預爲籌辦者也山東水勢長落無定或先長而後忽落或先小而後復大漕船經由東境一千數百里向歸嶧滕魚臺濟甯東平東阿各州縣封雇船隻以備起剝之用而地方官相距甚遠兼顧不遑九年所雇剝船不免臨時逃散擬請酌改章程責成東省管河廳

員屋滿船小者裝米三十石大者至百石爲止一遇漕船淺阻斟酌起卸而由糧道按石給發飯錢以免枵腹至閘夫亦改由河員招集歸其約束一併由糧道給予工食庶不缺誤此又略改舊章宜預爲籌辦者也東平州運河之西有一鹽河倚山爲障爲東省鹽船所經要道漕船若由安山左近繞入鹽河至八里廟仍歸運道計程二百餘里較之徑渡黃流上有缺口大溜下有亂石樹椿者其難易懸殊是以商船率多避黃而趨此路上年因非運漕正道未敢試行十年行抵安山時如遇黃流過猛祇宜變通改道惟自安山三里堡入鹽河之路亦須預先勘明何處平順先立標竿爲誌免致臨時周章此又渡黃改道

宜預爲籌辦者也以上五端皆河工應辦事宜又皆在山東境內從前糧艘運北沿途修閘築壩挑河過剝均由南河東河兩督臣治黃治運注意專在漕務事事各有考成處處不惜重費故能駕輕就熟事無不舉今則黃流橫決運河失修河員之經費大減河運之米數極微欲以江北一隅數萬之漕而責山東以全力治河治運未免獨爲其難然部臣所以不冒竟廢河運者亦因成法不可輕改圖事不可畏難具有遠慮丁寶楨見義勇爲力顧大局亦必不因米數太少之故而忽視沿河應辦之工糧道王大經躬肩重任既已經歷險艱茲令再試危途不得不預爲綢繆免其遲誤現在欽奉

諭旨飭派漕臣張兆棟前往山東會勘築隄束黃事宜必可與東河督臣蘇廷魁山東撫臣丁寶楨面商一切相應請

旨敕下該督撫等通籌運道全局建可久之宏謨并將臣此摺所指興工之處分投興辦利目前之漕務臣當飭催該糧道等趕緊兌米及早開行仰慰

宸廑所有河運艱難設法預籌緣由謹會同漕運督臣張兆棟江蘇撫臣張之萬恭摺由驛馳陳伏乞

皇太后

皇上聖鑒訓示謹

奏

覆陳淮南鹽價難增捐

同治十年二月初二日

奏爲淮南鹽價礙難議增恭摺覆陳仰祈

聖鑒事竊查接管卷內接准部咨議覆督辦西征糧臺侍講學士袁保恆奏請權加鹽價以濟軍餉一摺應由兼管鹽務各督撫轉飭各運司鹽道將現辦綱引地方能否計飭加價體察商力民情據實覆奏等因同治九年九月初十日奉

旨依議欽此欽遵轉咨前來當經前兼署督臣魁玉札飭運司及各鹽道悉心籌議茲據兩淮鹽運使方濬頤署江南鹽巡道凌煥等先後詳覆臣查袁保恆原奏意在停捐以除積弊增價以裕軍儲用意未始不善惟各省鹽法情形不同卽就淮南而

論兩室礙難行者數端請爲

皇太后

皇上縷晰陳之夫所謂加增鹽價者將加之於商乎商人運鹽不能零星起運淮南奏定章程以六百觔爲一引五百引爲一票資本不足一票者卽不准運今擬每觔酌加三四文約計每票須增成本一千餘串分言之則形其少合計之則見其多此時淮南運商迴非昔比類皆集資湊運商力實有未逮其室礙難行者一也將加之於民乎近來西楚鹽價較承平時已屬騰貴一由鹽釐之過重一由銀價之過昂均以京外餉需緊迫未能減輕售價民間旣以鹽貴爲苦局中又以銷滯爲患若再按

勛加價則水販無利可圖勢必聞風而裹足梟徒有私可圖又將乘隙以賤售其窒礙難行者二也原奏謂一省獨加則滯各省同加則通此固可免避貴食賤之患殊不知市價難齊物情使然不獨一省有一省之價卽淮南自附揚州縣起推而至於江甯皖省以達楚西此岸與彼岸價皆不同緣路有遠近之分卽價有低昂之判今欲比而同之雖法令亦有時而窮其窒礙難行者三也原奏又謂加價之款卽與各省鹽勛出場時隨同正課收納此亦可杜以多報少之弊殊不知淮南新章之尙易招徠者全在緩納課釐成本藉以減輕轉輸可期便捷應納之課須緩至場鹽售與運販後再繳應納之釐須緩至到岸售與

水販後再繳引額以兩淮爲獨多加價卽以兩淮爲更鉅一旦責令商竈在於鹽觔出場之前完納鉅萬鹽價勢有不能其窒礙難行者四也以上各層係就淮南商力民情言之若論川淮交匯則淮引受害爲尤深前此長江未通川鹽行楚同一占銷淮地而彼時淮南兵燹之餘通泰二十場商逃竈困斂廢埽荒場鹽旣不能達岸引地原不妨讓人自賊平以後另定新章新舊各商添斂修埽逐漸整頓產數日增而湖北湖南爲銷鹽最廣之區迄今盡爲川私所占現計存垣存棧存岸淮鹽積壓過多苦無出路商人資本久擱年復一年運商則決裂堪虞場商尤困窮無賴竈丁貧而生變亦屬意中之事譬之治河下游無

歸墟之處上游必有溢瀆之患今欲求疏通淮銷非規復引地
不可欲規復引地非禁止川私不可臣於同治七年曾經剴切
陳奏而四川湖北湖南各督撫皆以軍餉爲重交章力爭部臣
亦調停其間是江督之於川鹽方欲遏之使絕而楚省且招之
使來臣目擊淮引地面盡被川私佔奪不禁川則盡壞我
朝之成法欲禁川則先開鄰省之釁端辦理掣肘焦灼萬分部
議謂節經江督奏請減價以敵鄰私淮引尙難暢銷是淮南目
前情形部中亦所洞悉臣斷不敢預存推諉不顧邊陲亦何敢
稍涉遷就貽誤磋商局所有淮南鹽價礙難議增緣由理合恭摺
覆陳伏乞

皇太后

皇上聖鑒訓示謹

奏

議復楚省淮南引地摺

同治十年三月十九日

奏爲湖南永州寶慶二府引地未便改運粵鹽恭摺覆陳并陳楚省引地被川鹽侵佔太甚懇請

敕部核議仰祈

聖鑒事竊准部咨議復湖南巡撫劉崐奏請於永寶二府試行官運粵鹽一摺衡州以下各屬能否不致侵灌近來淮南鹽釐收數遂形短少永寶二府係淮南口岸應由兩江督臣通盤籌畫有無窒礙准綱之處妥議覆奏等因同治九年九月初十日具奏奉

旨依議欽此欽遵轉咨前來先經前兼署督

臣

魁玉咨明粵省

會商妥辦茲准兩廣督臣瑞麟咨稱准粵鹽務引地各有定界不能攙越行銷湖南永寶二府自粵東禁海遷竈以後向食淮鹽厯年引課奏銷例由淮綱核辦今湘省議行官運粵鹽將粵課撥歸淮綱不特款項輻輳考成難以核計且由粵運鹽至湘節節均係粵省引地其中不肖船戶影射夾帶沿途洒賣情弊勢所難免實於粵省引課大有關礙況粵東遞年場產鹽劬亦僅敷粵引配運並無溢額若加增永寶二府食鹽場產不足又復從何購買湘省此議雖爲籌裕餉源起見而更易口岸委屬窒礙難行咨復核辦等因臣查湖南永州府一州七縣寶慶府一州四縣自康熙六年題准行銷淮鹽雍正乾隆時屢有改食

粵鹽之議均經內外臣工奏駁有案前人立法具有深意行鹽必分界限係我

朝大經大法凡兩省接壤之區不許鄰私稍踰尺寸引界一定縱有奸商偷漏影射越境卽以私論民尙知所畏懼官亦便於稽查卽如蘇松常鎮皆係浙鹽引地與淮南場竈僅隔一江鎮江與瓜洲淮棧僅隔咫尺路旣便捷價亦輕減然必須行銷浙鹽而不能改食淮鹽者正以界限分明則紀綱永守也湖南之永寶二府地居湘岸極邊又被粵私遍地侵灌淮鹽久已不至該處然不敢以二府改隸粵引者誠以示寶一經改隸則衡州亦將佔奪長沙亦將侵銷紀綱一紊萬事紛亂且聞此二郡藉

以保長衡之藩籬尚可冀將來之暢旺且鹽政不敢棄引地而不顧猶之疆臣不敢棄邊邑而不守今兩廣督臣既咨稱窒礙難行而兩淮運司方濬頤亦詳稱湘省各商均不願以永寶引地改屬粵中所有湘省官運粵鹽行於永寶之處臣未敢輕於議准抑臣更有請者部庫餉源以鹽課爲大宗鹽課又以兩淮爲大宗而兩淮引地之被侵奪者湖北全侵於川鹽湖南則既見侵於粵鹽又大侵於川鹽臣初次奏定淮南新章但重加抽鄰稅不遽拒絕鄰鹽旋因軍務大定又於七年奏請禁止川私入楚無非欲收回引地冀復昔時之盛現查川私侵楚以鄰稅收數計之同治四五年間其勢稍衰自七年分逐漸加增八九

兩年川鹽愈來愈旺照淮南之六百觔成引者計之每年占銷不下三十萬引蓋一萬二千萬觔之多而繞越夾帶漏稅之私尙不在此數湖北九年分所銷淮鹽僅七萬餘引比川鹽銷數不過三分之一喧賓奪主莫此爲甚運庫課釐日減上年秋冬所收短絀尤甚以致部撥

大婚彩綢之款不能應解鹽積如山庫空如洗場商數百家艱窘尤甚現在存堆在途到泰到瓜之鹽共有五十餘萬引無處銷售存堆者成本之占擱已多到瓜棧者有上倉住船之費有換包折觔之耗公私之虧累尤巨日內紛紛至臣處呈稟請令運商先買繳價運商亦因楚岸不銷觀望不前今年垣產甚旺

臣勉強借給銀十五萬兩令場商收買春產場商猶以款少鹽多不能遍收深恐竈丁賣私通梟尤慮其貧極生變而船戶數千亦因無鹽可運窮迫無聊蓋淮南自官商以至船竈夫役數十萬人此兩月閒皆皇皇焉若生計之將盡者不料鹽務竭蹶一至於此臣辦理不善咎固難辭亦實由楚岸引地盡被川鹽侵佔譬之農家被人奪去田產舉室無措也部文有云通泰各分司場竈所產鹽觔無從銷售必致私梟競起關係全局所以百數十年無有改易淮南口岸之議殆不啻曰擊淮南近日苦况矣臣於七年九月奏禁川私入楚一疏經戶部議准欽奉諭旨飭李鴻章等撤局停稅飭吳棠封禁井竈并令覈議覆奏

旋於八年秋冬李鴻章覆奏川鹽未可遽禁者六端而議於沙市設局以川鹽八成淮鹽二成配銷吳棠覆奏川鹽濟楚難以遽停者四端而力言井之不宜封禁經戶部先後議覆均令前兩江督臣馬新貽力圖補救爰商覆奏厥後沙市二八配銷之局初議以飭計繼議以包計川鹽每包三百五十觔至八十觔不等八成則近三千觔淮鹽每包連包索八十六觔二成則僅一百七十二觔名爲淮占二成實則不及一成由此川勢日旺淮銷日微淮商吞聲飲憾而無如之何今欲挽回一二惟求皇上敕下戶部主持全綱剖斷是非縱不能全禁川私入楚亦當使淮多於川保守

國家之大經大法或淮八成而川二成或淮七而川三川雖極多亦不得滿四成庶幾官私判別成憲常昭其分成之法或指明某府某縣暫准借食川鹽或鄂境每歲准行川鹽若干萬觔不許溢額但求部臣將大概規模斷定其餘細微條目臣當與川楚諸臣妥商章程具奏凡疆吏辦事全賴各省和衷乃克有濟向來江督鹽務本仗楚督緝私催銷始有起色道光年間林則徐周天爵爲楚督時則淮鹽大暢他人爲督其時並無袒護川鹽之事而苟非一心維持則淮銷常滯蓋責弁役以緝私課州縣以銷數非本省大吏不足鞭策之也曰今湖廣督臣李瀚章曾在臣軍久管糧臺相得益彰深知其顧全大局毫無私見

於臣處事件無不竭力相助然外間頗議其袒護川鹽膜視淮
鹹非與淮爲難也該督覓鄂中水陸各營京協各餉需款甚鉅
恐一旦川鹽不暢餉項驟減前數任已成之規不欲自已而隳
且見貧民散勇謀食於川鹽者多恐其失業滋事此二者籌之
愈熟故於川鹽護之愈堅今欲楚岸鹹綱之平允但在楚督一
心之轉移一心向川則川銷旺而眾商有恃矣分心向淮則淮
銷旺而眾商亦有恃矣臣所求者淮鹽堆積場棧者五十餘萬
引堆積鄂湘者十餘萬引於此七十萬引中稍稍行銷楚岸則
運商場商之氣爲之一蘇煎丁網役及謀食於淮之眾不至失
業滋事卽爲大幸而淮南本分之引地不至棄而他屬亦臣盡

職之一端至於餉項之贏絀則臣絕不敢爭昔年初定章程淮鹽行楚每引撥釐銀四兩二錢解交湖北糧臺後遞減爲二兩四錢初章撥釐銀六兩一錢二分解臣安慶糧臺後遞減爲三兩九錢二分七釐今欲鄂省減去川鹽入款願將臣處應得釐銀多撥數成歸鄂抑或全數歸鄂如其全數歸鄂則每銷淮鹽一引鄂省可得銀六兩三錢有奇以近日銀價計之合錢十一千有奇較之鄂省銷川鹽六百觔僅收川釐十千有奇尙屬淮勝於川於鄂餉有盈無絀果能勤緝川私鄂中應無難辦之處倘蒙

皇上乾斷楚省引地必歸淮南作主其餘各節臣當與李瀚章

吳棠爰商無不通融辦理俟湖北酌堵川鹽稍有起色再商湖南堵川之法續行奏辦所有議覆永州寶慶二府未便改運粵鹽暨楚省引地被川鹽侵佔太甚緣由恭摺具奏請

旨敕部核議伏乞

皇太后

皇上聖鑒訓示謹

奏

聖訓頒到謝

恩摺

同治十年六月十三日

奏爲恭謝

天恩仰祈

聖鑒事竊

臣欽奉

頒發

文宗顯皇帝聖訓全部共二十二函由便員自京帶出敬謹祇
領當卽恭設香案望

闕叩頭謝

恩訖伏維我

朝成憲於恭纂

寶錄之外

特派臣工編集

聖訓一書所以表

勲業於文章炳球圖於霄漢也我

文宗顯皇帝臨寓十有一年無時不以法

祖愛民爲念無日不在憂勤惕厲之中

聖德謙冲

訓詞深厚饜中外臣民之望軼漢唐詔令之文偶舉偏端無不

經天緯地獲觀全帙允足震古鑠今

偉烈豐功陋封禪於七十二代

盛德大業契眞源於三五六經凡黃閣之傳宣暨

丹毫之記注罔弗慮牟六合函蓋四瀛摹繪乎乾坤神明乎短
矐仰維我

皇上道隆繼述

志在纘承合人閑共讀之至文成天上難窺之祕笈

命史臣而詳校

寵疆吏而分頒虹光下賁於石渠鴻寶遠傳於江介臣拜經比

重發篋增榮感

三朝優渥之

恩懷兩宇因循之

誠在昔備員卿貳親聆

天語提撕洎乎承乏戎旃悉稟

廟謨指授追思往事具在斯編仰

鉅製於訓誥典謨欽

至德於聖神文武書萬本而誦萬徧如見

先皇圖治之心謨丕顯而烈丕承大啟

聖主中興之業所有微臣感激下忱謹繕摺叩謝

天恩伏乞

皇太后

皇上聖鑒謹

奏

大閱事竣摺

同治十年十一月初一日

奏爲

微臣

查閱營

伍事竣回省陳明大概情形恭摺仰祈

聖鑒事竊同治九年輪應查閱江蘇營伍前督

臣

馬新貽未及

舉行

臣

蒞任後奏

請展緩嗣經定於八月十三日出省校閱均

附片具奏在案伏查江蘇通省水陸各營大閱之典自道光三

十年以後迄未舉行東南用兵十有餘年綠營幾同虛設軍務

肅清稍稍補募缺額尙多而挑練改設日有增損此次通行校

閱約有四宗曰原設之綠營卽經制額兵也曰新改之水師卽

臣七年冬月所奏經部議准者也曰挑練之新兵卽就各營挑

出另練馬新貽

丁

日昌所奏准者也曰畱防之勇營昔年未撤

之勇陸續酌畱者也臣先於八月十二日在省城閱看江甯督標四營暨新兵五營又星字勇丁二營十三日啟程十八日至揚州二十日閱看揚州城守鹽捕二營並調閱奇兵泰州泰興瓜洲青山三江等營又慶字勇丁三營二十九日及九月初一初二日在清江閱看淮揚鎮標中右兩營及挑練之新兵營並閱漕標中左右三營淮安城守海州鹽城東海宿遷廟灣佃湖洪湖等營初三日由陸路赴徐州初九初十日閱看徐鎮中營城守營及挑練之新兵二營並調閱蕭營宿州營又鳳字勇丁二營仍由清淮南旋二十日在鎮江閱看鎮江營並調閱淞南淞北二營二十三日在常州閱看常州營並調閱孟河江陰靖

江等營二十六日在福山閱看福山鎮標左右二營並調閱狼
山鎮標陸汛及右營劉河通州海門等營十月初二日在蘇州
閱看撫標左右城守等營並調閱平望太湖等營又慶字等勇
丁二營初六日在松江閱看提標中左前後松江城守等營並
調閱金山青村柘林等營又駐防鳳凰山洋人教練之勇丁三
營十二日在吳淞口閱看吳淞川沙南匯掘港等營並調閱提
右營及蘇松鎮標中左右等營又在海口閱看外海艇船六營
內洋八團舢板五營及新造輪船操演一次遂於十五日由輪
船回抵江甯省城綜計通省水陸各營除浦口溧陽二營兵數
太少淮揚鎮左營清江城守營蔣壩營及葦蕩左右二營均係

河營改操但將官弁校閱未經調閱兵丁外其餘各營查閱一周計陸營四十有一水營十有一挑練之新兵營十有一畱防各勇之營十有二兵數則原額三萬三千四百名有奇現存二萬四千二百名有奇其中多寡參差不一有已逾原額之半者有不及原額三分之一者兵數較多之營演陣尙有可觀其畸零不成隊者數營合操仍難整齊緩急殊不足恃臣悉心酌核就今日之情形準以舊時之條例參訪當世有識之議論其必宜更改者約有數端向例營兵差操二字混在一處然差則護餉押犯緝捕等事必須散處塘汛各專責成操則習技練陣聽令等事必須聚處營盤同受約束其事迥不相同近來聚處紮

營者如神機營直隸練軍及江甯蘇州之新兵皆於額兵之中另挑立營既須屯聚常練卽不能散處當差而各項差使勢又不能盡廢將來經制之兵似宜分差操爲兩起差則兵宜散而少官宜以分塘分汛爲額操則兵宜聚而多官宜以分營分哨爲額此舊制之宜改者一也向例綠旗餉銀馬兵二兩戰兵一兩五錢守兵一兩米則一律日支八合三勺卽使照數滿發猶不足以供事畜之資而各省司庫支絀尙有祇發七成八成者勇丁口食或多至一倍二倍兵丁或小貿營生或手藝餬口應名充數出征則漫無鬪志毫不足恃此天下綠營之通病目前直隸練軍及江蘇新兵各營皆已加餉然加餉而不裁兵則度

支立匱斷不足以持久此舊制之宜改者二也向例各營軍械俱用烏鎗門藥風則吹散雨則沾溼實不利於戰陣近年各處兵勇俱用洋鎗銅帽精而且捷風氣一開人人以烏鎗門藥爲苦在上者雖有大力不能強遏人情軍事最貴神速而最忌遲鈍準情度勢恐不能不全用洋鎗而各項器械亦有當用洋製者此舊制之宜改者三也向例各路水師並不講求船隻造船經費不取之於司庫但令官員攤派或由紳富捐辦兵丁仍用馬戰守名目殊覺名實不符竊謂旣號水師卽宜居住舟中官兵皆以狎水爲能但有頭舵鎗礮之分並無馬兵戰守之名日漸月摩或者由支河而漸及大洋由小舟而漸及巨艇由防內

而漸及禦外亦銖積寸累之義將來各省水師似皆宜籌造船之費以船爲家但可兼操陸隊不能分管陸汛此舊制之宜改者四也以上四端如水師先重船隻一節臣於同治七年奏改章程厥後馬新貽修造外海內洋裏河各船隻大致粗備操練亦頗勤篤其軍械全用洋鎗一節各省果能籌款均可自行奏改其差兵與操兵分爲兩途及酌加餉數二者則大變舊章關係全局非奉有

特旨飭改或由部臣議定通行外省臣工不敢率爾立意遽議更張臣前改水師已自覺其鹵莽今閱陸營豈敢復有變更惟當就缺額最多之營飭令招足一半認真操練稍復舊觀亦未

敢必其遂堪折衝禦侮也所有查閱營伍事竣回省陳明大概情形緣由理合繕摺具奏伏乞

皇太后

皇上聖鑒訓示謹

奏

續議江蘇水師事宜摺 同治十年十二月二十二日

奏爲續議江蘇水師事宜恭摺仰祈

聖鑒事竊臣議改江蘇水師章程於同治七年十一月初四日專摺具陳旋准兵部會議復奏請

旨敕下兩江總督等查照各條妥爲辦理各等因於同治八年

三月間知會到蘇彼時臣已赴任直隸前兩江督臣馬新貽逐

條核辦與提臣李朝斌及蘇松狼山福山三鎮總兵詳細斟酌

略有損益並諮訪熟於江蘇營伍之人參酌舊制釐定新章二

十五條馬新貽業已定稿過印擬於大閱之時察看各處地勢

再行具奏臣接任後查閱馬新貽所定原稿大致略備其中有

數事與原奏稍異者如裏河五營內之淞南淞北兩營地段太寬船隻太少提臣李朝斌屢有改章之請馬新貽以奏定之案不欲率爾更張往返籌議至再至三今年派員勘查裏河各地段一次始定仍如前議略添船隻而於汎地之中專以官塘幹河爲重支河汊港處分從寬俾責任較專而巡查易遍此馬新貽尙未確定而近日議妥者也又如蘇松狼福等三鎮額兵臣初次議奏除水兵分船派定外每鎮各畱陸兵一百名本謂水師以船爲家不必尙存陸兵名目嗣後馬新貽博采眾議僉謂三鎮陸兵有必須承應之差有不可盡廢之勢改爲蘇松狼山兩鎮各畱兵五百名福山鎮本有右營陸兵計原額五百三十

三名現祇存兵二百名擬再招二百名合之原奏之一百名亦
成五百名之數其統帶之官弁互有更換又如海門一營原奏
擬歸狼山鎮統轄嗣經李朝斌與馬新貽會商以海門營汛地
離狼山鎮爲遠而離蘇松鎮爲近擬改撥蘇松鎮管轄以期形
勢聯絡此二條皆馬新貽所改定臣復加察核無以易之者也
其餘各條俱就原奏應辦之事一一臚列大致與長江章程相
彷彿惟彼則創始此則酌改故於新章之中仍須兼顧舊制馬
新貽屬稿時苦心經營實屬詳備臣就原稿二十五條中刪減
三條歸併一條定爲二十一條另繕清單恭呈
御覽伏乞

敕下各衙門詳議定奪臣之微意總以水師之住船譬諸陸師之紮營狎習舟居爲水師之根本講求船礮爲禦外之根本是以區區籌議迭次瀆陳然皆不過就嘉慶道光年間之規模稍加整理至異日輪船愈多或者外海內江悉用輪舟則今日所辦之船所立之法將悉爲可棄之筌蹠是所望於後之賢者因時變通臣之才智尙未暇及此也至馬新貽所議章程近年行之已有成效自應參酌上陳以補臣原奏所不逮所有續議江蘇水師事宜緣由謹會同江蘇巡撫臣張之萬恭摺具奏伏乞皇太后

皇上聖鑒訓示謹奏

謹將續議江蘇水師章程二十一條開單恭呈

御覽

第一條外海六營輪流巡哨

查原奏外海六營無事之時輪流巡哨有事之際一體剿捕該六營既不分汛地自應按月輪巡今擬定以十二船分爲三起第一起四船駐馬蹟東巡至陳錢西巡至大小羊山七山北巡至四礮雞骨礁等處第二起駐十浹東巡至佘山北巡至洋漲沙木錨套南由銅沙巡至乍浦交界之葛蓬墩瀉水漕東南巡至大小七山及雞骨礁等處第三起駐塘鱸港南巡至洋漲沙木錨套東北巡至東凌斗崙王家等港一帶南匯營與掘港營

合爲一起蘇松中左兩營合爲一起吳淞川沙兩營合爲一起由各該鎮督帶分起出洋每起每營分雙單月第一號承值上半月第二號承值下半月遇有失事卽將承值員弁參處俟定案後彙同營制送部查核

第二條內洋五營劃分汛界

查原奏內洋五營略分汛地自應劃清界限以專責成狼右營轄北岸上游所部八團舢板十二號擬以狼山港駐四船營船港駐四船老洪港駐四船西以張皇港與長江之江陰營分界東以牛洪港與北岸下游之通州營分界南以中洪與南岸上游之福左營分界通州營轄北岸下游所部八團舢板十二號

擬以宋季港駐四船太平港駐四船三丫支港駐四船西以牛
洪港與北岸上游之狼右營分界東以塘鱸港與外海分界南
以協安永旺青魚楊家惠安等沙中洪與蘇松右營分界福左
營轄南岸上游所部八團舢板十二號擬以白茆港駐四船滄
浦港駐四船鹿苑港駐四船西以蝦蟆山與長江之江陰營分
界東以七丫港口與南岸下游之海門營分界北以中洪與北
岸上游之狼右營分界海門營轄南岸下游所部八團舢板十
二號擬以劉河口駐四船吳淞口駐四船黃家灣駐四船惟黃
家灣一帶並無泊船之港擬令暫於吳淞寄碇仍按日赴該處
巡哨西以七丫港口與南岸上游之福左營分界東以紅星塔

與海外分界東北以江流入海並崇寶石頭等沙中洪與蘇松
右營分界蘇松右營轄崇明南北兩岸所部八團舢板十二號
擬以當沙頭駐四船協安沙駐四船永興沙駐四船西南以江
流入海並崇寶石頭等沙中洪與南岸下游之海門營分界北
以協安永旺青魚楊家惠安等沙中洪與北岸下游之通州營
分界東以十漊外沙腳淺水與外海分界各按五日會哨一次
逢五與本營會哨逢十與別營會哨再北岸上游之狼右營南
岸上游之福左營其迤西均與長江之江陰營交界應令於每
月初一十五兩日各會哨一次庶江海聯爲一氣可以呼應靈
通至各該營與陸營分界以近岸一里爲率其沿江各口與陸

營分界以進口五里爲率所有各汛地段應俟定案後彙造營制冊圖送部查核

第三條裏河五營劃分汛界

查原奏淞南淞北兩營分轄吳淞江南北兩岸太湖左右兩營分巡太湖東西兩路提標右營專防黃浦一江凡水師與陸營交界之處固應劃清界限卽各該營汛境亦應明晰分定今擬提右一營分前後左右四哨內前後兩哨每船五號左右兩哨每船四號尙餘兩號作爲營官總巡之船太湖左右淞南北四營各分前後左右四哨每哨四船共計十六船太湖兩營各餘八團舢板兩號淞南淞北兩營各餘舢板二號均作爲營官總

巡之船淞南營轄吳淞江以南北自三江口以東以吳淞江爲界三江口以西以致和塘與淞北營分界南以運河震澤梅埏塘與太湖左營分界淞北營轄吳淞江以北北自三江口以東以吳淞江分界三江口以西以致和塘與淞南營分界致和塘以西以運河與太湖右營分界太湖左營巡緝東路東南以運河震澤梅埏塘與淞南營分界太湖右營巡緝西路西北以運河與淞北營分界其左右兩營卽以沙墩港口分界其運河由望亭至沙墩港口歸左營巡緝由沙墩港口卽屬右營湖面仍歸吳塘馬山埭嘴沙墩各汛巡緝提標右營專防黃浦一江自三泖起至吳淞口止專歸巡緝惟太湖等四營汛地湖蕩支

渠紛歧錯出應以官塘幹河爲專責以支河汊港爲兼巡每一營四哨分紮四段輪流巡哨各專責成各該營與陸營分界應以近岸一里爲率其鎮市設有陸汛係在官塘幹河者一里以內水陸分任其責其有與長江內洋各營分界處所應以進口五里爲率所有各該營分隊駐船汛界已飭開具細摺呈送應俟定案後彙造營制冊圖送部查核

第四條淞南淞北太湖左右四營酌添船隻

查原奏淞北淞南兩營各設舢板船十五號太湖兩營各設舢板船十三號兼用八圍舢板各二號提標右營設舢板船二十號每舢板船配兵十四名復查提右營專防黃浦一江船隻尙

敷分布淞南北及太湖左右四營地段太寬船隻太少分巡扼要要在難周今擬該四營各添船三號每船仍配兵十四名計四營共添船十二號應添兵一百六十八名加以添派官弁應給廉糧經費雖不免增多而於設防巡緝較有裨益

第五條水營所遺陸汛分別移併畱防

查江蘇水師營分均係水陸兼防新章水師以船爲家所遺陸汛不特巡緝地面兼有城池倉庫接遞之責必須撥歸附近之陸汛兼管其相離較遠無可歸併者仍須畱撥陸兵以資巡緝而免偏廢內太湖左右兩營所轄之東山馬蹟山等處孤峙湖心汪洋巨浸無附近陸營可以歸併擬於該兩營酌畱陸兵五

十名外委一員以資分布巡緝並於舊制額外內酌畱一員糧餉卽在五十名兵數內支給其所畱之兵卽於提標各營未經募足之空額內調撥各按派防汛地歸該兩營營官就近兼轄其陸汛之鄰近蘇常等汛者仍就近撥歸分管至提標右營退出陸汛撥歸附近之松江城守營兼轄並擬將提後營遊擊移駐嘉定轄吳淞劉河兩營所遺陸汛以柘林營都司移駐南匯接管川沙南匯兩營所遺陸汛以收居中調度之益其柘林營所遺本汛則撥歸金山營兼管其中南匯營舊汛之一帶地方與青村營相近擬卽撥歸青村營管轄其提後營所遺全汛撥歸提前營兼管又福山鎮中左兩營所遺陸汛查有福山右營

現係專管陸路應將該兩營舊汛併歸管理其福中營議裁之
兵一百名歸右營分防陸汛又狼山中左右掘四營陸汛地面
甚廣附近之泰州泰興等營相距太遠勢難兼顧該鎮原畱之
陸兵一百名實屬不敷分布茲擬於狼山鎮兼轄之泰州泰興
揚州三營各撥兵額一成或一百四十三名又在附近之常州
江陰靖江三江等營抽撥兵丁二百名又於提標空額內撥補
五十七名共成四百名千把外委八員前赴狼鎮所屬於城守
及緊要汛地分別填紮原奏以通州營爲狼山鎮中軍今查通
州營地處下游離城較遠應改以泰州營遊擊爲狼山鎮中軍
所有原畱及擬調之陸兵卽歸該中軍遊擊就近兼轄應飭

餉均照陸營舊制其泰州地方擬將泰興都司移駐以重汛地
所有各該營水陸分汛冊圖俟定案彙齊送部查核

第六條京口三營陸汛礮堤分別管轄

查京口中右兩營新章改爲淞南淞北兩營京左營裁撤該三
營江面均係長江水師汛地其臨江之小洲水師亦可兼顧惟
各營原轄有大沙洲一處迴環百有餘里必須撥歸陸汛巡防
查該處與北岸三江營相似擬在該營抽兵四十名移駐大沙
洲並畱京左營裁缺千總一員作爲專汛歸三江營守備管轄
又道光年間奏設防江礮堤京口中左右三營汛內有原管大
小石灣劉閘沙圖山大二礮頭東生洲等礮堤數處事關江防

舊制既無陸營接防擬撥歸附近之長江水師管轄以昭慎重

第七條酌擬改隸營分並畱設守備

查原奏內洋南岸下游海門營主之歸狼山鎮管轄今查海門營新汛在川沙寶山太倉州境內與狼山鎮相隔幾及百里呼應欠靈而與蘇松鎮則相離較近應將海門營改隸蘇松鎮管轄又太湖左營係副將營分並統轄右營都司而本營所屬僅止千把弁缺與營制稍有未符擬請畱設守備一缺卽將原奏移調南匯營之太湖右營守備移調太湖左營專管錢糧子藥軍裝等件既與體制相洽亦於人地相宜並於該營添設之三船內少設外委一缺以符其數至南匯營應添之守備一員改

以狼中營撥歸川沙營之守備一員移調其川沙營二號艇船正哨查原奏川沙營本有應裁千總一員應請毋庸議裁撥歸該艇填補以免輾轉調撥

第八條緊要陸汛酌定多畱陸兵

查蘇松鎮駐紮崇明四面皆海中左右三營所遺陸汛週圍三四百里汛口七十餘處外接大海內連長江向爲水陸兼防扼要之區新章中左兩營改爲外海右營改爲內洋哨官住船不准登岸則所遺陸汛萬難虛懸且有城池倉庫錢糧接遞之責非有陸兵駐防不足以資巡緝又上海地方華洋雜處人煙稠密該處向設之提標右營現已專管水師縣城內外地面冗闊

戢暴查奸在在均關緊要亦非酌留陸兵不可現擬於蘇松三營所遺陸汛內除原留陸兵一百名外加留四百名千把外委十員歸蘇松中營兼轄上海留兵二百名汛弁兩員並添設守備一員仍歸提右營參將就近兼轄所留弁兵均於提標各營未經募足之額內調撥餉項不另加增其守備一缺擬於水營中多留千總一員而調一守備於陸汛庶幾海疆要隘不致有空懸之慮

第九條核定將弁處分

查舊制武職疏防搶劫案件分別參處現在外海內洋裏河三大支水師均係住船而自都司以下均屬哨官並無離汛里數

遠近之分亦無專汎協防兼轄統轄之別四船駐防一處遇有失事之案未便將四船哨官一律開參茲定外海艇船十二號分三起按月輪流巡哨計兩營四艇爲一起每起每營分雙單月分一號承值上半月二號承值下半月如有失事卽將承值將弁參處由營官將職名開送查參各營一律照辦內洋每港派駐四號分兩船出巡港之上游兩船出巡港之下游仍按逢五與本營會哨逢十與別營會哨以一船承值半箇月派巡地段內設有失事卽將輪巡員弁參處亦由營官將職名開送查參裏河五營內提右一營專防黃浦一江如有失事由營官開送職名查參其餘四營每營分爲四段每段派船四號以官塘

幹河爲專責以支河汭港爲兼巡各認汎地不必會哨如有失
事在官塘幹河者照專汎之例由營官開送職名查參在支河
汭港者照兼轄之例開參均應照長江章程以都守千把外委
五項哨官爲專汎之官以副參遊都司四項營官爲本轄之官
遇有搶劫案件專汎哨官係何職名應由該營官指出初參仍
照定例四月限滿題參疏防專汎官住俸本轄者罰俸六箇月
二三四等參向例一年限期者酌量加重改爲各子限八箇月
二參限滿專汎官降一級畱任本轄者罰俸一年三參限滿專
汎官降二級畱任四參限滿專汎官加重降二級調用不准抵
銷如汎內有一夜連劫數次情事仍照舊例俟三箇月限滿犯

無弋獲卽將專汛官降二級調
限內獲犯過半兼獲盜首者均
面報明提鎮移知臬司州縣官
期不參卽由臬司揭參

第十條各營現定船數

查原奏外海六營各撥艇船二
號內洋五營各撥八團舢板十
二號裏河五營內提標右營撥
營各十五號太湖兩營各十三
號兼用八團舢板各二號又提
鎮各撥火輪船一號又現撥淞
南北及太湖左右四營各添船
三號共計十二號所有外海艇
船十二號已由廣東釘造齊全

用本轄官降二級畱任倘能於
准免其參處失事之時營官一
一面稟明本府臬司如本營屆

按營撥給其內洋五營八團舢板六十號太湖兩營八團舢板四號亦經吳城燕子磯兩廠如數造齊分派駕駛其有須改用領江船者經費相等俟下次修造時酌量改換裏河五營內太湖左右淞南北四營所用舢板亦經飭廠次第造齊其提標右營所須長江舢板二十號先在太湖水師裁撤之船內擇用五號其餘十五號另行釘造給領至輪船一項現在尙未造齊已另案奏明歸前臺灣道吳大廷統轄操演俟將每年參養輪船經費籌定後應否分撥一提三鎮爲巡防外海內洋之用屆時專案奏辦

第十一條酌定外委缺數

查部議江蘇所裁之缺因遲就始存舊官全裁外委未裁千把
究應裁千把若干外委若干應令妥洽情形再行籌議復查各
營舊制每千把一員設立外委一員將來千把出缺應照該營
缺數補還外委計南匯營應裁二號副哨把總一員改設外委
一員蘇松中營應裁二號副哨把總一員改設外委一員蘇松
左營應裁二號副哨千總一員改設外委一員吳淞營應裁二
號副哨把總一員改設外委一員川沙營應裁二號副哨把總
一員改設外委一員掘港營應裁二號副哨把總一員改設外
委一員蘇松右營福山左營狼山右營通州營原定千總外委
缺數應請照舊海門營應裁千總二員把總二員改設外委四

員提標右營應裁千總三員把總四員改設外委六員太湖左
右兩營應裁把總七員改設外委七員淞北營應裁千總一員
把總三員改設外委四員淞南營應裁千總一員把總三員改
設外委四員以符營制又福山左營現留陸兵一百名應留該
營原額外委一員專管陸兵

第十二條酌定裁缺外委薪糧

查部議現任武職裁缺留標另補照原任職銜支給俸薪惟外
委一項向食馬兵糧餉而本案營制又無馬步戰兵名目其應
作何支給之處酌定報部查核復查長江水師新章外委支給
柁糧雙分轉較裁缺千把爲優茲酌定裁缺外委支給柁糧單分

月給銀三兩六錢額外月給銀三兩以資養贍

第十三條營官建署地方

查原奏外海六營不分汛地以吳淞口十墩爲各艇船停聚之所又離岸稍遠水師不能兼顧等語現在外海六營十二船分爲三起派駐地段輪流巡哨所有該六營營官衙署應於吳淞口塘鱸港兩處建立查各該營現在均有舊署應准暫行借住俟新署造成再行遷移內洋裏河十營均應於該管汛內近水之處建立衙署庶一切呼應較靈內狼右蘇右兩營尙可仍循其舊海門營應以劉河營舊署爲新署該營舊署已廢應行另建通州營新汛離城較遠應於新港建署福左營已無舊署應

行另建提標右營上海城內本有參將衙署毋庸另建淞北營
應於常熟城外建署淞南營應於周莊鎮西隅建署太湖左營
應在東山重建新署太湖右營應在宜興之烏溪關建署以重
汛守其各船哨官自都司以至外委不立衙署不准登岸居住
違者官卽革職兵卽革糧再各營官建署後應各給差兵十名
以資照料均於提標各營未經募足之空額內撥給

第十四條各營座船數目

查原奏第十四條科算出入經費聲明此外尙有座船書識子
藥等費又長江水師第二十條內陸營之例馬改爲水師之座
船是各官均應給予座船俾資辦公惟江蘇水師提鎮兼轄陸

營與長江新設者不同例馬一項仍應照舊開支自不得兼支
座船其自營官以下則應仍照長江章程辦理副參遊各給座
船二號各營哨官自都司以至外委各給座船一號副參遊每
座船各月支銀十四兩都守以下每座船各月支銀十二兩惟
太湖右營係以都司爲營官應准給座船二號以示區別

第十五條官兵數目

查外海六營其艇船十二號內設參將二員遊擊四員爲營官
都司一員守備八員千總六員把總三員外委六員爲哨官又
輪船四號原奏係設都司四員守備一員千總三員爲正副哨
官每艇船配兵四十名共四百八十名每輪船原奏配兵六十

名共二百四十名內洋五營共八團舢板六十號內設副將一員遊擊四員爲營官都司五員守備四員千總十員把總十八員外委二十三員爲哨官每八團舢板一號配兵二十名共一千二百名裏河五營共八團舢板四號長江舢板八十八號內設副將二員參將一員遊擊一員都司一員爲營官守備三員千總十五員把總三十二員外委三十七員爲哨官每八團舢板一號配兵二十名共八十名每長江舢板一號配兵十四名共一千二百三十二名通共設副將三員參將三員遊擊九員都司十一員守備十六員千總三十四員把總五十三員外委六十六員共配兵三千二百三十二名惟輪船一項現派遣員

統領操演未歸提鎮管轄與原奏官兵數目不符將來籌定養船經費尙須專案另奏

第十六條核定書吏名數

查江蘇水師現改新章各官應用書識應援照長江水師章程核給江南提督衙門本有額設稿書書識與長江水師新設者不同無庸增添總兵各用稿書二名書識六名副參遊各用稿書二名書識四名都司各用稿書一名書識二名惟太湖右營都司係屬營官應用稿書二名書識三名守備各用書識二名惟淞南淞北太湖左狼山右福山左五營並無都司專設守備一員事務較繁應各加稿書一名其各船千把外委同係哨官

亦有應辦之事各准用書識一名以上共用稿書五十三名書識二百八十六名

第十七條雨篷旗幟等費

查內洋裏河各船並無竹篷木勝惟以布棚遮蔽其旗幟一項尤應整齊現當立營之始各營旗幟號衣均須隨船新製普發一次以後歲修之需查長江章程長龍戰船每年發銀六十兩今八團舢板與長龍相等擬定每年亦發銀六十兩長江舢板照章每年發銀四十兩交各營哨官採辦修飾至艇船一項船身既大且終年出入外洋風擊蟲蛆最易損壞每年由艚燂洗四次所費甚鉅其旗幟號衣篷帳等項亦所必需擬定每船每

年各給銀二百四十兩隨時修理以壯軍容而昭慎重

第十八條官兵糧額

查原奏內洋裏河十營將弁兵丁書識應須廉俸蔬薪等項悉照長江水師章程給發至外海六營均宜稍從豐厚除營哨各官月加公費業經部議核准外查水師提督及蘇松狼福三鎮額定廉俸本屬無多嗣後既須常出督巡責任重大亦應酌加公費用示體卹擬提督每月加給巡洋經費銀一百兩總兵每月加給巡洋經費銀八十兩以資辦公至原定廣艇舵工等項訪之久於巡洋者尙應稍爲變通擬每船設正舵一名月給銀九兩副舵一名月給銀七兩二錢班手繚手各二名月各給銀

六兩錨舵一名月給銀六兩木匠艙匠各一名月各給銀五兩
以上共九名均係出洋捕盜必不可少之人且仍在每船額兵
四十名之內所加餉項亦屬無多其艇船稿書與繚糧同月給
銀六兩書識與兵糧同月給銀四兩五錢又各營稿書書識並
非兵丁應照例俟五年役滿考職送部

第十九條各營船隻酌用槍礮數目

外海六營艇船十二隻每船應配礮十尊洋槍十二桿內洋五
營八團舢板六十隻每船配礮五尊洋槍六桿裏河八團舢板
四隻每船配礮五尊洋槍六桿裏河五營舢板八十八隻每船
配礮二尊洋槍四桿通共大小礮位六百一十六尊洋槍八百

八十桿此外長矛刀杖噴筒亦須隨宜配用現於甯蘇軍裝局將水陸各軍繳存礮位洋槍軍械儘數勻撥尙有不敷另行添購足數

第二十條各船火藥洋火子彈等項數目

查各船大小礮位六百一十六尊大者三四千觔次者一千餘觔小者六七百觔不等每月約用土藥近七千觔洋槍八百八十桿每月約用洋藥四百四十餘觔洋火三萬六千餘顆洋鉛子四百四十餘觔此外皮紙更香封門大小熟鐵羣子若遇緩急應隨時酌數請領共月需經費約在千兩左右按年總共約需銀一萬餘兩土藥鐵子鉛丸擬在蘇州設局製造洋藥洋火

等項擬在上海陸續購買將來外洋六營就近在上海請領內
洋裏河十營就近在蘇局請領

第二十一條核計餉項

查前奏部議按照道光二十八年以後兵馬銷冊及咸豐二年
估冊內開江蘇水師二十一營歲需薪俸餉乾米折其銀二十
六萬二千一百七十三兩六錢三分四釐內除未經裁減之鹽
城東海兩營餉米共銀二萬一千一百十六兩八錢四分又原
定蘇狼福三鎮各舊兵丁一百名餉米五千五百兩零八錢均
仍支舊餉應行扣除外計原設水師十六營額支舊餉二十四
萬零三十四兩五錢七分八釐現在新立外海內洋裏河十六

營除輪船餉需另行核計外所有官兵俸薪養廉餉米加以提鎮公費馬乾書識各營哨官公費座船書識又每船月給雜費通盤核計每歲若需銀二十三萬兩有奇核之十九營額餉尙屬有減無增惟改定章程條目太多將來或尙有續增之款總使新定之餉不浮於舊額之數以符原議而重帑項其狼山營酌開兵四百名係由揚州等營抽撥及提標空額內募補蘇松鎮添留兵四百名上海留兵二百名太湖留兵五十名各營署共畱差兵百六十名均係在於提標各營未經募足之空額內調撥本有舊餉可抵毋庸另行核計至於各營更調官兵有由江屬撥歸蘇屬者有由蘇屬撥歸江屬者又有此營撥歸彼營

者原額餉銀應由江蘇兩藩司先行查明分別撥抵再由各營查照向章按季備具領冊送候核明統歸藩庫放給彙同陸營餉項按年題銷至每年所用火藥子彈皮紙更香等項需款甚鉅又各營船隻風浪之沖擊礮火之震動不能不隨時修整必須籌有專款溯查部議從前修造船隻司庫例動銀十九萬七千餘兩按照十年攤算每年應動銀一萬九千七百餘兩現擬卽儘此款作爲採辦軍火修造船隻之用統歸糧餉案內一律報銷此外尙有裁撤外委四十五名畱營候補每月各給養贍銀三兩六錢每年共計銀二千一百餘兩此項人員將來補一少一原非常年額款尙屬易爲籌計至輪船各項經費原奏第

十四條內聲明在二成洋稅項下動支不在例定額餉之內將來造成日多必須另籌餉輪船之費另案奏辦

楚岸鹽引淮川分界行銷摺 同治十一年正月二十八日

奏爲楚岸淮南引地業經會商定議暫與川鹽分界行銷恭摺
覆陳仰祈

聖鑒事竊楚省引岸被川鹽侵占太甚經臣國藩於同治十年
三月間縷晰具奏嗣准戶部奏覆應由兩江會同湖廣四川妥
議章程奏明辦理同治十年六月二十五日奉

旨依議欽此恭錄轉咨前來臣等伏查行鹽各有引界今以川
淮兩省之鹽同行湖北一界之內此暢則彼滯勢有必然近年
淮南銷數日疲存鹽壅積無術疏通皆由川鹽到處洒賣遂使
淮引之界幾被川鹽占盡論鹽觔則色白味鹹川貨本甚於淮

論搬運則下水順流川路較近於淮論民情則楚人食川習慣而已成自然論官事則川販聚楚驟禁而恐生事變故川私侵佔淮南引地雖屬大紊紀綱之事而有萬難遽變之勢今欲於積重難返之後挽回一二仍當暫分疆界爲徐圖規復之計湖北淮引之地九府一州此

國家之大法終古不變者也就川私侵淮之地而於其中收復數府專行淮綱酌分數府准銷川鹽者此目下之權宜四面兼顧者也臣等函牘往來籌商再四就湖北九府一州計之現定將武昌漢陽黃州德安四府先行歸還淮南專銷淮鹽其安陸襄陽鄖陽荊州宜昌荆門五府一州仍准川鹽暫行借銷議定

淮分之界不准川鹽侵人分寸而川分之界仍可由淮商就中酌設子店撥售零引以明本係淮引地方不可喧賓而奪主一割而永棄前於沙市所設配銷局既於川販多所未便而淮銷亦並無成效應將此局裁撤移設新堤改爲分銷淮鹽局至武漢黃德四府內湖北所設抽收川稅水陸局卡亦一律裁撤禁止川鹽不得顆粒侵銷四府地界此會議分界之大略也淮鹽滯銷之由固由川私充斥而銀價日昂鹽價日貴亦屬有礙銷路初定章時湖北每銀一兩約易錢一千五百餘文今則增至一千八百餘文居民買鹽則用錢而局中售鹽則收銀水販成本因之暗增不能不量予酌減查楚岸定章本定每引售銀二

十四兩厥後遞減至十九兩二錢現擬每引再減售價一兩二錢每正引六百觔定售銀十八兩所減之價在於應解鄂淮鹽釐內各半分扣將來銀價如跌再將鹽價隨時酌提以昭平允此減價之大略也地方州縣本有緝私疏銷之責若不加意整頓深恐完稅之川鹽雖申禁令而無稅之川私勢更蔓延加以潞私北私交相侵灌名雖定界仍無補於淮銷除湖北飭派緝私各兵勇照常佈置外所有武漢黃德四府擬擇扼要之地設卡分堵凡潞私北私及川鹽越界漏稅之私仍由臣瀚章通飭各州縣不分畛域幫同局卡實力緝拏每年年終由督銷局會同湖北鹽道視銷數之暢滯定州縣之勤惰開具清摺送由臣

等會同考核酌量勸懲以收實效一面由臣國藩責成運司督飭各場講求煎煉之法務使淮南鹽色日潔期與川鹽相敵倘有以醜劣低鹽運棧立將場員記過撤委此又講求緝務整頓鹽色之大略也兵燹以後戶口大減各岸應銷之鹽較昔年額數已屬極少而業鹽而謀食者人數日眾場井之產亦日多臣等不敢期銷數之極旺但求業淮鹺者不至因銷路被奪而遂絕生計業川鹺者不至因銷路被堵而別出事端是卽兩全之道此次分界之後如果淮釐有贏鄂釐日絀卽當貼補鄂餉其於勻分餘利而止如果淮銷仍滯川銷大暢卽當嚴堵川私期於不侵新略而止若其軍事大順滇黔肅清川鹽自有本管之

引地則今日分割之五府一州仍當歸還淮綱淮南引地行之數百年不刊之典臣未敢輕於議割也總之隨時體察川淮情形補偏救敝務在不戾時宜不墜憲章至湖南堵川之法前經臣國藩奏明俟湖北酌堵川鹽稍有起色續行奏辦現查湘省祇有岳州常德澧州三屬行銷川鹽岳州係達省會之門戶常德係入辰沅之要津均爲淮鹽緊要口岸亦經議定專歸淮銷惟澧州與荊州相近川鹽運往路捷價輕應暫分與川銷其餘未盡事宜俟開辦數月再行酌核續陳所有臣等會議暫行分界銷售緣由理合會同四川督臣吳棠署湖南撫臣王文韶恭摺具奏伏乞

皇太后

皇上聖鑒訓示謹

奏